

**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KEEMPAT,  
PARLIMEN KEEMPAT BELAS**

**PERTANYAAN : LISAN**

**DARIPADA : DATO' SERI ANWAR BIN IBRAHIM  
[ PORT DICKSON ]**

**TARIKH : 11 OKTOBER 2021 (ISNIN)**

**SOALAN**

**DATO' SERI ANWAR BIN IBRAHIM [ PORT DICKSON ]** minta **MENTERI PERTANIAN DAN INDUSTRI MAKANAN** menyatakan kesan menyeluruh ke atas nelayan, petani dan pekebun kecil akibat Perintah Kawalan Pergerakan dan sejauh mana langkah-langkah diambil bagi menangani permasalahan pendapatan mereka yang terjejas.

**JAWAPAN**

**Tuan Yang Di Pertua,**

Untuk makluman Ahli Yang Berhormat, penularan pandemik COVID-19 dan pelaksanaan Perintah Kawalan Pergerakan (PKP) sememangnya telah memberi kesan kepada sektor agromakanan negara secara langsung dan tidak langsung di mana kelancaran rantai makanan terganggu antaranya pengeluaran, pengedaran, pemasaran dan peruncitan produk hasil pertanian dan industri makanan.

Kesan pandemik COVID-19 kepada subsektor tanaman menyebabkan saiz penanaman ladang terpaksa dikecilkan, jadual penanaman disusun semula, penjualan hasil tuaian semakin berkurangan serta pertukaran kepada tanaman lain yang boleh memberikan pulangan segera kepada pengusaha. Subsektor ternakan turut terjejas akibat

peningkatan kos input penternakan, pengurangan pengeluaran dan kebolehpasaran ternakan serta hasil ternakan. Manakala bagi subsektor perikanan pula, pengeluaran perikanan bagi tahun 2020 mengalami sedikit penurunan sebanyak 4.4% berbanding tahun 2019.

Kementerian Pertanian dan Industri Makanan (MAFI) komited dalam memastikan kesinambungan bekalan makanan kekal terjamin dalam apa jua keadaan. Antara langkah-langkah yang telah diambil bagi membantu golongan petani yang terkesan dengan pandemik COVID-19 termasuk pelaksanaan Inisiatif Dana Jaminan Makanan (DJM) berjumlah RM1 bilion bermula pada bulan Mac 2020 yang lalu bertujuan untuk menjamin bekalan makanan kekal terjamin dan mencukupi, menstabilkan harga produk pertanian serta meluas dan memperkukuh ruang pasaran sepanjang tempoh pandemik COVID-19.

Pelaksanaan DJM ini merangkumi empat (4) fasa pelaksanaan yang telah disesuaikan dengan pelaksanaan plan pemulihan negara iaitu;

- i) Pakej Ransangan Ekonomi Prihatin Rakyat 2020  
**(PRIHATIN 2020) – RM190 juta**
- ii) Pakej Pelan Jana Semula Ekonomi Negara 2020  
**(PENJANA 2020) – RM227.32 juta**
- iii) Pakej Pelan Jana Semula Ekonomi Negara 2021  
**(PENJANA 2021) – RM150 juta; dan**
- iv) Pakej Inisiatif Dana Jaminan Makanan 2021  
**(DJM 2021) – RM338 juta.**

Ini menjadikan jumlah keseluruhan Dana Jaminan Makanan adalah sebanyak RM 905.3 juta. Penyediaan DJM ini merupakan langkah intervensi untuk membantu pengusaha pertanian dengan segera, serta secara tidak langsung telah menyuntik dana untuk mengaktifkan kembali rangkaian ekonomi agromakanan bermula daripada pengeluar sehinggalah ke peringkat hiliran dan runcit. Pelaksanaan DJM ini juga merupakan pelengkap kepada pelbagai subsidi, insentif dan bantuan yang disediakan di bawah MAFI kepada golongan sasaran iaitu pesawah, petani, penternak, nelayan dan pengusaha pertanian.

## SOALAN NO : 22

Untuk makluman Ahli Yang Berhormat jua, DJM tidak termasuk pelaksanaan Pakej Rangsangan Ekonomi (PRE) 2020 sebanyak RM50 juta yang merangkumi 918 perolehan dan projek kecil di seluruh negara bagi merangsang perniagaan kontraktor Bumiputera yang terkesan dengan kelembapan ekonomi yang disebabkan oleh kesan awal pandemik COVID-19 pada ketika itu.

Selain daripada bantuan-bantuan dan inisiatif menerusi Dana Jaminan Makanan dan Pakej Rangsangan Ekonomi yang diberikan, MAFI melalui Jabatan dan agensi terlibat membantu kumpulan sasaran yang terkesan disebabkan oleh Perintah Kawalan Pergerakan adalah seperti berikut:

- i. Program Bakul Makanan di bawah program MAFI Prihatin yang memberi sumbangan berbentuk makanan bagi meringankan bebanan golongan yang terjejas akibat pandemik COVID 19. Seramai 86,246 penerima di 326 lokasi seluruh negara telah menerima manfaat yang disampaikan melalui pelbagai jabatan dan agensi kementerian pada tahun ini sehingga Julai 2021;
- ii. Sebanyak 35,681 surat kelulusan kebenaran beroperasi telah dikeluarkan semasa tempoh pandemik bagi tempoh Januari hingga Ogos 2021 bagi memastikan pengeluaran hasil dan rantaian nilai makanan tidak terjejas memandangkan aktiviti pertanian juga telah dikategorikan sebagai perkhidmatan penting negara (*essential services*) dan dibenarkan beroperasi sepanjang masa;
- iii. Sebanyak 48,281 latihan secara atas talian telah dibuat bagi meningkatkan kemahiran dan khidmat nasihat sama ada melalui panggilan telefon, panggilan video, webinar serta melalui platform media sosial seperti facebook dan aplikasi whatsapp yang melibatkan 50,182 petani dan 436,487 pengunjung melalui media sosial;
- iv. Platform pemasaran digital (e-dagang) bagi membantu meningkatkan peluang pemasaran para petani dan pengusaha melalui platform e-dagang seperti Agrobazaar Online dan

## SOALAN NO : 22

NekmatBiz serta kerjasama strategik dengan syarikat swasta seperti Lazada, Shopee dan AirAsia;

- v. Pemberian kadar bayaran sewaan premis kerajaan sebanyak 50% kepada pengusaha di semua kemudahan Ladang Satelit di Taman Kekal Pengeluaran Ruminan (TKPR) dan operator swasta di rumah sembelih serta program;
- vi. Memberikan penangguhan pembaharuan semua lesen vesel penangkapan ikan sehingga 1 Oktober 2021 serta meneruskan pemberian Elaun Sara Hidup Nelayan Laut dan Darat dengan kadar yang telah ditingkatkan;
- vii. Memberikan pengecualian syarat minimum pendaratan ikan melalui Laporan Operasi Vesel (LOV) dan purata keaktifan Mobile Transducer Unit (MTU) untuk pembaharuan lesen vesel penangkapan ikan laut dalam Zon C2; dan
- viii. Program Geran Pepadanan *Change Upgrade Products* (CUP) bagi aktiviti ekonomi hiliran dalam sektor agromakanan yang memanfaatkan seramai 154 orang pengusaha industri asas tani pada tahun 2020 dengan peruntukan bernilai RM4 juta, manakala pada tahun 2021, sehingga kini seramai 141 pengusaha telah menerima manfaat dengan peruntukan bernilai RM4.4 juta.

MAFI berharap agar inisiatif-inisiatif termasuk program dan projek serta bantuan khas yang dilaksanakan dapat membantu para petani, nelayan dan penternak serta pengusaha agromakanan yang terjejas disebabkan COVID-19 pandemik dalam meneruskan kelangsungan perusahaan masing-masing dan memberikan sumber pendapatan yang mampan. MAFI akan terus mengambil segala tindakan bagi memastikan kepentingan kumpulan sasar sektor agromakanan terus terjamin.

Sekian, terima kasih.